



SPORAZUM O PRIMJENI APENDIKSA B ANEKSA 1A OPĆEG OKVIRNOG MIROVNOG SPORAZUMA ZA BOSNU I HERCEGOVINU I ANEKSA O NABAVKAMA I UGOVORIMA TEHNIČKOG SPORAZUMA IZMEĐU VLADE REPUBLIKE BOSNE I HERCEGOVINE I SNAGA ZA IMPLEMENTACIJU MIRA (IFOR)

Svrha ovog sastanka između Glavne komande EUFOR-a, Štaba NATO-a u Sarajevu, CAFAO-a i Uprave za indirektno oporezivanje je dogovor o praktičnoj primjeni tačke 16. Sporazuma između Republike Bosne i Hercegovine i Organizacije Sjevernoatlantskog pakta (NATO) o statusu NATO-a i njegovog osoblja (Apendiks B Aneksa 1A Općeg okvirnog mirovnog sporazuma za Bosnu i Hercegovinu) i Aneksa o nabavkama i ugovorima Tehničkog sporazuma između Vlade Republike Bosne i Hercegovine i Snaga za implementaciju mira (IFOR), u vezi oslobađanja od plaćanja indirektnih poreza na dodatu vrijednost za robe i usluge od dobavljača iz Bosne i Hercegovine.

Prema gore navedenim pravnim dokumentima, EUFOR i Štab NATO-a u Sarajevu su oslobođeni plaćanja indirektnih poreza pri nabavljanju roba i usluga, uključujući i porez na dodatu vrijednost, koji za EUFOR i Štab NATO-a u Sarajevu iznosi nula posto.

EUFOR-ov Odjel za carine i Uprava za indirektno oporezivanje sporazumjeli su se o sljedećem:

1. Za sva oslobađanja EUFOR-a i Štaba NATO-a u Sarajevu od plaćanja poreza pri nabavljanju roba i usluga koristit će se formular o oslobađanju od poreza (TEF) koji je dat u aneksu Tehničkog sporazuma između Vlade Republike Bosne i Hercegovine i Snaga za implementaciju mira.
2. Formular TEF će sadržavati sljedeće podatke:
  - a. jedinstveni kontrolni broj;
  - b. naziv i adresu kompanije, i njen identifikacijski broj za indirektno oporezivanje;
  - c. opis dostavljenih roba i pruženih usluga, jedinicu mjere, količinu, cijenu u koju je uključen porez, po vrstama, i cijenu bez poreza;
  - d. potpise i pečate osobe koja je ovlaštena da raspolaže službenim pečatom EUFOR-ovog Odjela za carine i carinskog službenika EUFOR-a.
3. Uputstva za popunjavanje TEF formulara data su u Aneksu B ovog sporazuma.

4. Formular TEF će se popunjavati u tri primjerka, a po jedan primjerak formulara će se dostavljati:
  - a. dobavljaču;
  - b. EUFOR-ovom Odjelu za carine;
  - c. Upravi za indirektno oporezivanje - na bosanskom jeziku, s kopijom fakture, a dostavu će izvršiti EUFOR-ov Odjel za carine.
5. EUFOR-ov Odjel za carine će nabaviti TEF formulare (u tri primjerka) s jedinstvenim kontrolnim brojem i dostaviti ih, zajedno s uputama za popunjavanje, osobama ovlaštenim za raspolaganje pečatom EUFOR-ovog Odjela za carine.
6. Dok se ne nabave TEF formulari (u tri primjerka) s jedinstvenim kontrolnim brojem, bit će prihvatljiva sadašnja verzija TEF formulara s lokalnim kontrolnim brojem, ukoliko se popune tri originalna primjerka.
7. Poželjno je da se TEF formular dostavi za fakture koje su već poslane EUFOR-u i Štabu NATO-a u Sarajevu, a u koje je uključen PDV, kako bi se iz tih faktura isključio PDV. Ova aktivnost će otpočeti kad Uprava za indirektno oporezivanje potvrdi da su šefovi odsjeka za poreze u regionalnim centrima Uprave za indirektno oporezivanje i šef Odsjeka za kontrolu velikih poreznih obveznika obaviješteni o ovom sporazumu.
8. Uprava za indirektno oporezivanje će obavijestiti šefove odsjeka za poreze u regionalnim centrima i šefa Odsjeka za kontrolu velikih poreznih obveznika o implementaciji ovog sporazuma.
9. Odjel za carine Glavne komande EUFOR-a dostavit će Upravi za indirektno oporezivanje spisak osoba koje su ovlaštene za raspolaganje službenim pečatom i spisak dobavljača.
10. Ovaj sporazum stupa na snagu kad ga potpiše direktor Uprave za indirektno oporezivanje.

---

g. Kemal ČAUŠEVIĆ  
Direktor  
Uprava za indirektno oporezivanje

---

brigadni general Manfred HOFMANN  
Načelnik Štaba  
GK EUFOR-a

**Sarajevo, 18.01.2006.godine**

Aneksi:

A. Formular TEF iz Tehničkog sporazuma između Vlade Republike Bosne i Hercegovine i Snaga za implementaciju mira.

B. Uputstva za popunjavanje TEF formulara.